

Na osnovu člana 79 Ustava Crne Gore ("Sl. list Crne Gore" br. 1/07, i 38/13) i čl. 33, 34 i 35 Zakona o manjinskim pravima i slobodama ("Službeni list RCG", br. 31/06, 51/06 i 38/07 i „Službeni list Crne Gore”, broj 002/11, 008/11 i 031/17), kao i člana 21 Pravila za izbore članova savjeta manjinskog naroda ili druge manjinske nacionalne zajednice (Službeni list Crne Gore, broj 58/2017" od 22.09.2017) Bošnjačko vijeće, na sjednici održanoj 05.06.2021.godine, u Rožajama , usvojilo je

STATUT BOŠNJAČKOG VIJEĆA U CRNOJ GORI

I OSNOVNE ODREDBE

Član 1

Statut je najviši pravni akt Bošnjačkog savjeta/vijeća (u daljem tekstu: Vijeće) kojim se uređuju pojam, ovlaštenja Vijeća , organizacija i način izbora organa i tijela Vijeća, područje rada Vijeća, kao i druga pitanja značajna za rad Vijeća, u skladu sa Ustavom i Zakonom.

Član 2

Vijeće je tijelo nacionalne samouprave izabrano na osnovu principa dobrovoljnosti, demokratičnosti i slobodnog izbora identiteta. Vijeće je najviše zastupničko tijelo bošnjačkog naroda u Crnoj Gori u oblastima očuvanja nacionalnog identiteta. Vijeće vrši i druge poslove u skladu sa Zakonom.

Član 3

Izrazi koji se u ovom Statutu koriste za lica u muškom rodu podrazumijevaju iste izraze u ženskom rodu.

Član 4

Naziv Vijeća na službenom jeziku je : BOŠNJAČKI SAVJET U CRNOJ GORI.

Radi očuvanja kontinuiteta i prepoznatljivosti kod pripadnika bošnjačkog naroda, naziv Vijeća na bosanskom jeziku koji će se službeno koristiti ravnopravno sa nazivom iz stava 1 je: BOŠNJAČKO VIJEĆE U CRNOJ GORI.

Član 5

Članovi Vijeća vrše svoju funkciju u interesu bošnjačkog naroda, koji živi u Crnoj Gori, u skladu sa Ustavom Crne Gore, Zakonom i Statutom.

Član 6

Vijeće je neprofitno pravno lice. Svojstvo pravnog lica stiče upisom u Registar koji vodi resorno ministarstvo.

Vijeće ima svoj žiro račun.

Vijeće predstavlja i zastupa predsjednik Vijeća.

Član 7

Sjedište Vijeća je u Rožajama, ulica Raduna Đukića bb.

Član 8

Simboli Vijeća su grb i zastava.

Grb Vijeća je u obliku evropskog štita koji je podijeljen bijelom lentom koja ide dijagonalno iz gornjeg lijevog ugla ka desnoj strani. Na lijevoj dojagonalnoj polovini grba, na plavoj podlozi su tri ljiljana zlatno žute boje, jednake veličine ravnomjerno raspoređeni ispod donjeg rub lente. Na desnoj dijagonalnoj polovini, na zelenoj podlozi, su tri bijela polumjeseca otvorena prema desnoj strani, raspoređeni u obliku jednakostraničnog trougla.

Zastava Vijeća je bijele boje sa grbom opisanim u stavu 2.ovog člana, u sredini

Član 9

Vijeće ima pečat po čijem gornjem obodu je latinicom ispisano BOŠNJAČKI SAVJET, a paralelno sa ovim tekstom BOŠNJAČKO VIJEĆE, u donjem obodu Rožaje.

Vijeće ima štambilj dimenzija 30×20 mm, koji sadrži naziv, oznaku za broj i datum.

III VIJEĆE

Sastav Vijeća

Član 10

Izbor članova vijeća vrši se raspisivanjem izbora po pravilima i obrascima za izbor članova savjeta koje donosi Ministarstvo.

Mandat članova Vijeća traje četiri godine od dana verifikacije mandata članovima.

Član 11

Vijeće ima 24 člana.

Vijeće punovažno odlučuje ako sjednici prisustvuje većina od ukupnog broja članova Vijeća. Odluke se donose većinom glasova prisutnih članova, ukoliko Zakonom, Statutom ili Poslovníkom o radu Vijeća nije drugačije određeno.

Član 12

Funkcioneri Vijeća su: predsjednik Vijeća, potpredsjednici Vijeća i predsjednik Izvršnog odbora Vijeća.

Prava i obaveze članova vijeća

Član 13

Član Vijeća ima pravo:

1. učestvovati u pripremanju, donošenju i u izvršavanju kao i u kontroli izvršavanja odluka Vijeća.
2. zatražiti od funkcionera i organa Vijeća objašnjenje u pogledu aktuelnih pitanja u radu Vijeća i oni su dužni dati odgovor.
3. da bira i bude biran u radna tijela Vijeća;
4. učestvovati bez prava odlučivanja u radu odbora i radnih tijela , predlagati predsjedniku odbora održavanje rasprave o pojedinim pitanjima iz nadležnosti odbora.
5. zatražiti od Kancelarije Vijeća objašnjenja potrebna za njegov rad, kao i stručnu pomoć.

Član Vijeća ima obavezu:

1. aktivno učestvovati u radu Vijeća kao i u radu tijela Vijeća čiji je član ;
2. obavijestiti Vijeće o spriječenosti da prisustvuje sjednici Vijeća ili ako je spriječen da izvrši preuzetu obavezu;
3. izvršava i druge obaveze u skladu sa Statutom i Zakonom.

Prestanak mandata članovima Vijeća

Član 14

Mandat članova Vijeća traje koliko i mandat Vijeća i mogu biti ponovo birani.

Članu Vijeća prestaje mandat prije isteka mandata Vijeća :

1. ako mu prestane funkcija na osnovu koje je postao član Vijeća;
2. razrješenjem;

3. gubitkom biračkog prava;
4. na lični zahtjev i
5. u slučaju smrti.

U slučajevima prestanka mandata iz stava 2 tačka 1.3.4.5., Vijeće će bez rasprave konstatovati prestanak mandata na prvoj narednoj sjednici.

Ukoliko u toku trajanja mandata prestane funkcija članu po funkciji na osnovu koje je postao član Vijeća, njegovo mjesto u Vijeću pripada licu izabranom na tu funkciju, ako je pripadnik bošnjačkog naroda i prihvata članstvo u Vijeću.

Ukoliko se upražnjeno mjesto člana Vijeća po funkciji ne može popuniti na način iz prethodnog stava, popunjavanje će se izvršiti iz reda kandidata sa liste utvrđene na elektorskoj skupštini, tako što će to mjesto pripasti kandidatu sa najvećim brojem glasova.

Član Vijeća može biti razriješen ako:

1. nesavjesno obavlja poslove člana Vijeća;
2. trajno izgubi sposobnost za vršenje poslova člana Vijeća.
3. je osuđen na безусловnu kaznu zatvora ili je osuđen za krivično djelo koje ga čini nedostojnim za obavljanje poslova člana Vijeća i
4. ne opravda svoje odsustvo sa sjednice Vijeća najmanje tri puta u toku kalendarske godine.

Predlog za razriješenje može podnijeti predsjednik Vijeća ili 1/3 članova Vijeća. Predlog se podnosi u pisanoj formi i mora biti obrazložen.

Ukoliko član Vijeća (po funkciji ili izabran na elektorskoj skupštini) da ostavku na članstvo u Vijeću, popunjavanje će se izvršiti iz reda kandidata sa liste kandidata utvrđene na elektorskoj skupštini, tako što će to mjesto pripasti kandidatu sa najvećim brojem glasova.

Ostavka se obavezno podnosi u pisanom obliku i ne može se opozvati.

Obavještenje o prestanku funkcije , kao i zahtjev za prestanak funkcije, član dostavlja Vijeću u pisanoj formi, a Vijeće na prvoj narednoj sjednici konstatuje prestanak mandata.

Članu Vijeća prestaje mandat izborom novog saziva Vijeća.

Član 15

Pravo članova Vijeća, članova organa Vijeća i drugih tijela na naknade , putne troškove za odlazak i dolazak na sjednice organa i tijela Vijeća i na naknadu drugih troškova vezanih za obavljanje poslova iz ovlašćenja Vijeća će se urediti posebnom odlukom Vijeća.

Mandat Vijeća

Član 16

Mandat Vijeća traje od dana održavanja konstitutivne sjednice do izbora novog saziva Vijeća u skladu sa Zakonom.

Mandat Vijeća prestaje prije vremena u skladu sa Zakonom:

1. smanjenjem broja članova Vijeća ispod 17;
2. odlukom više od polovine članova Vijeća;
3. ukoliko Vijeće ne usvoji Statut i Poslovnik o radu u roku od šest mjeseci od konstituisanja Vijeća i
4. u ostalim, Zakonom utvrđenim slučajevima.

Ovlaštenja Vijeća

Član 17

Vijeće:

1. u skladu sa Ustavom i Zakonom donosi i mijenja Statut, Poslovnik i druga akta;
2. bira i razrješava predsjednika i potpredsjednike Vijeća, predsjednika Izvršnog odbora Vijeća, sekretara Vijeća, imenuje i razrješava članove Izvršnog odbora Vijeća;
3. utvrđuje funkcionalnu i organizacionu strukturu Vijeća, imenuje i razrješava članove radnih tijela Vijeća;
4. usvaja budžet, završni račun Vijeća, godišnji izvještaj o radu i plan rada
5. podnosi predlog državnim organima, organima lokalne uprave i javnim službama za unapređenje i razvoj prava Bošnjaka;
6. podnosi inicijativu predsjedniku Crne Gore da zakon kojim se narušavaju prava Bošnjaka ne proglasi;
7. učestvuje u planiranju i osnivanju vaspitno-obrazovnih institucija;
8. predstavlja bošnjački narod u oblastima službene upotrebe jezika, obrazovanja, kulture i informisanja na bosanskom jeziku.
9. učestvuje u očuvanju i odlučuje o načinu zaštite, predstavljanja, afirmacije i ostvarivanja nacionalnih, kulturnih, prosvjetnih, socijalnih, ekonomskih i svih drugih građanskih i kolektivnih prava od interesa za Bošnjake u Crnoj Gori.
10. donosi odluku o nacionalnim simbolima, znamenjima, praznicima i ličnostima iz tradicije bošnjačkog naroda u cilju očuvanja, zaštite i unapređivanju nacionalnog, kulturnog, jezičnog i vjerskog identiteta Bošnjaka;

11. učestvuje i predlaže izradu nastavnog plana za potrebe nastave predmeta koji izražavaju posebnost bošnjačkog naroda na bosanskom jeziku, i učenja bosanskog jezika sa elementima bošnjačke historije i kulture;
12. radi i predlaže izradu dijela nastavnog plana u lokalnim zajednicama gdje je bošnjačko stanovništvo većinsko u skladu sa Zakonom o obrazovanju;
13. odlučuje o pojedinim pitanjima u oblastima: upotrebe bosanskog jezika i pisma, u javnoj upotrebi, u službenoj upotrebi, odgoja i obrazovanja;
14. donosi odluke o informisanju na bosanskom jeziku. Donosi odluke i preporuke i po potrebi izdaje potvrde o publikacijama, organizacijama, udruženjima i NVO čiji je rad od posebnog značaja za bošnjački narod i stvara uslova za rad postojećih i osnivanje i razvoj novih organizacija i institucija od interesa za Bošnjake na području djelovanja Vijeća;
15. osniva udruženja, zadužbine-vakufe, NVO i fondacije te ustanove za obavljanje djelatnosti javnog obavještanja, kulture, izdavaštva, muzejske, arhivske, književne, naučne i obrazovne djelatnosti;
16. daje mišljenje državnim organima, ili jedinicama lokalne samouprave, prilikom odlučivanja o pitanjima iz djelokruga službene upotrebe jezika, obrazovanja, kulture i informisanja na bosanskom jeziku. Daje preporuke za upis studenata bošnjačke nacionalnosti na univerzitet;
17. obraća se tijelima države, ili jedinice lokalne samouprave u vezi pitanja koja se odnose na položaj i prava bošnjačkog naroda;
18. ima pravo uložiti žalbu nadležnom Sudu Crne Gore u slučaju procjene da je došlo do povrede ustavnih prava i sloboda pripadnika bošnjačke nacionalne zajednice, ili u slučaju da mu se obrati pripadnik bošnjačke nacionalne zajednice koji smatra da je uskraćen u svojim ustavnim pravima i slobodama;
19. s posebnom pažnjom prati položaj i održava kontakte sa pripadnicima bošnjačkog naroda izvan granica Crne Gore;
20. u skladu sa uzajamnim interesima saraduje i sklapa sporazume sa domaćim i stranim organizacijama, ustanovama, jedinicama lokalne i manjinske samouprave.
21. prima materijalnu i finansijsku pomoć od domaćih i stranih organizacija, fondacija i privatnih lica i stara se da država obezbijedi poreske i druge olakšice ili oslobađanje od carine u skladu sa zakonom;
22. odlučuje i učestvuje u izradi projekata od interesa za bošnjački narod. Razvija saradnju unutar bošnjačkog naroda, saradnju bošnjačkog naroda s ostalim nacionalnim zajednicama, te saradnju bošnjačkih nacionalnih organizacija i institucija s drugim nacionalnim organizacijama i institucijama;
23. zastupa prava i interese bošnjačkog naroda koji živi na teritoriji Crne Gore u pitanjima nacionalne samouprave pred domaćim i stranim tijelima i organizacijama, kao i pred tijelima i organizacijama matične države;
24. donosi odluke o dodjeli nagrada i priznanja pojedincima, institucijama i organizacijama čiji rad je od posebnog interesa za bošnjačku nacionalnu zajednicu;

25. predlaže drugim institucijama u zemlji ili inostranstvu dodjeljivanje priznanja, nagrada ili odlikovanja članovima bošnjačkog naroda;
26. zalaže se za realizaciju i implementaciju posebnih manjinskih prava zaštite identiteta Ustav CG člana 79, kao i prava iz Zakona o manjinskim pravima i slobodama.
27. vrši ostale Zakonom i Statutom utvrđene nadležnosti.

Vijeće može vršenje pojedinih poslova povjeriti svojim organima i radnim tijelima.

IV ORGANI I RADNA TIJELA VIJEĆA

Član 18

Organi Vijeća su : Predsjednik Vijeća i Izvršni odbor.

Radna tijela Vijeća su: odbori, komisije i konsultativna tijela.

Mandat svih organa Vijeća, radnih tijela, odbora, savjeta, imenovanih i postavljenih lica traje četiri godine.

Predsjednik i potpredsjednici Vijeća

Član 19

Vijeće ima predsjednika i jednog ili više potpredsjednika, koje Vijeće bira iz redova svojih članova.

Za predsjednika i potpredsjednika Vijeća može se kandidovati i prihvatiti kandidaturu svaki član Vijeća.

Član 20

Predsjednika Vijeća, Vijeće bira tajnim glasanjem, ako se na sjednici drugačije ne odluči, većinom od ukupnog broja članova Vijeća, na vrijeme trajanja mandata Vijeća.

Predsjednik Vijeća je izabran kada predsjedavajući konstatuje da je za njega glasala većina od ukupnog broja članova Vijeća.

Ako su predložena dva ili više kandidata za predsjednika Vijeća, a u prvom krugu nijedan od kandidata ne dobije potrebnu većinu, u drugom krugu se glasa o dva kandidata koja su u prethodnom krugu imala najveći broj glasova. U drugom krugu izabran je kandidat koji dobije većinu glasova od ukupnog broja članova Vijeća.

Ako u drugom krugu nijedan od kandidata ne dobije potrebnu većinu, postupak kandidovanja i izbora se ponavlja.

Predsjednik Vijeća može funkciju obavljati profesionalno.

Član 21

Potpredsjednika/e Vijeća na predlog predsjednika , Vijeće bira tajnim glasanjem, ako se na sjednici drugačije ne odluči, većinom glasova od ukupnog broja prisutnih članova Vijeća, na vrijeme trajanja mandata Vijeća .

Postupak izbora potpredsjednika je regulisan Poslovníkom o radu Vijeća.

Član 22

Predsjednik i potpredsjednici Vijeća za svoj rad odgovaraju Vijeću.

Član 23

Mandat predsjednika i potpredsjednika Vijeća prestaje prije isteka vremena na koje je biran:

1. davanjem ostavke,
2. prestankom članstva u Vijeću,
3. gubitkom biračkog prava ,
4. razrješenjem ,
5. prestankom funkcije po čijem je osnovu postao član Vijeća i
6. u slučaju smrti .

U slučajevima prestanka mandata iz stava 1. tačka 1.2.3.5.6., Vijeće će bez rasprave konstatovati prestanak mandata na prvoj narednoj sjednici.

U slučaju podnošenja ostavke, predsjedniku i potpredsjedniku Vijeća prestaje funkcija danom održavanja sjednice na kojoj je ostavka podnijeta. Ako je ostavka podnijeta u vremenu između dvije sjednice, predsjedniku i potpredsjedniku prestaje funkcija danom održavanja naredne sjednice Vijeća.

Vijeće može razriješiti predsjednika i potpredsjednike Vijeća prije isteka vremena na koje su birani na obrazložen prijedlog najmanje trećine vijećnika, na isti način na koji su izabrani.

O prijedlogu za razrješenje otvara se rasprava.

Prijedlog za razrješenje se podnosi u pisanoj formi i mora biti obrazložen.

U slučaju prestanka mandata predsjednika Vijeća prije isteka vremena na koje je biran, Vijeće može donijeti odluku o imenovanju vršioca dužnosti, čija funkcija može trajati najduže do šest mjeseci. Vršilac dužnosti se bira većinom glasova od ukupnog broja članova Vijeća.

Poslovi i ovlaštenja predsjednika Vijeća

Član 24

Predsjednik Vijeća:

1. saziva i predsjedava sjednicama Vijeća
2. predstavlja i zastupa Vijeće;
3. predlaže plan rada Vijeća;
4. usmjerava i usklađuje rad organa Vijeća;
5. predlaže kandidate za potpredsjednike, predsjednika Izvršnog odbora Vijeća i sekretara Vijeća;
6. podnosi izvještaj o obavljanju povjerenih nadležnosti;
7. rješava o pravima, obavezama i odgovornostima iz radnog odnosa zaposlenih, odlučuje o prijemu u radni odnos ili angažovanju lica za potrebe Vijeća,
8. predlaže Vijeću usvajanje pravilnika o unutrašnjoj organizaciji i sistematizaciji radnih mjesta u Vijeću;
9. stara se o evidentiranju pitanja postavljenih od strane članova Vijeća i prati postupak davanja odgovora na njih;
10. pomaže rad članova i Odbora Vijeća;
11. potpisuje odluke Vijeća i zapisnik sa sjednice Vijeća;
12. odgovara za zakonitost u poslovanju Vijeća i odgovorno je lice za raspolaganje finansijskim sredstvima Vijeća;
13. donosi pojedinačne akte za koje je ovlašten Zakonom i Statutom;
14. predlaže Vijeću funkcionalnu i organizacionu strukturu Vijeća i tijela Vijeća
15. vrši i druge poslove u skladu sa Zkonom i Statutom.

U slučaju sprječivosti predsjednika, u slučaju posebnih potreba, predsjednika mijenja jedan od potpredsjednika koga on ovlasti.

Izvršni odbor Vijeća

Član 25

Izvršni odbor ima najmanje devet članova a najviše jedanaest, uključujući i predsjednika Izvršnog odbora .

Predsjednik Izvršnog odbora se bira iz reda članova Vijeća.

Članovi Izvršnog odbora ne moraju biti članovi Vijeća.

Predsjednika Izvršnog odbora na osnovu njegovog ovlašćenja zamjenjuje član Izvršnog odbora.

Član 26

Predsjednik Izvršnog odbora je odgovoran za svoj rad Vijeću i predsjedniku Vijeća.

Član 27

Predsjednik Izvršnog odbora rukovodi radom Izvršnog odbora.

Predsjednik Izvršnog odbora može profesionalno obavljati funkciju.

Pravo na podnošenje prijedloga za izbor predsjednika Izvršnog odbora ima predsjednik Vijeća.

Član 28

Članove Izvršnog odbora na osnovu prijedloga predsjednika Izvršnog odbora imenuje i razrješava Vijeće.

Vijeće može većinom glasova od prisutnih članova razriješiti člana Izvršnog odbora prije isteka mandata.

Član 29

Izvršni odbor Vijeća bira Vijeće na period trajanja mandata Vijeća.

Predsjednik Izvršnog odbora bira se na prijedlog predsjednika Vijeća.

Predsjednika Izvršnog odbora Vijeća bira Vijeće tajnim glasanjem većinom od broja prisutnih članova Vijeća.

Ukoliko predloženi kandidat za predsjednika Izvršnog odbora ne dobije potrebnu većinu od broja prisutnih vijećnika, postupak izbora se ponavlja predlaganjem drugog kandidata.

Kandidate za članove Izvršnog odbora predlaže predsjednik Izvršnog odbora, u dogovoru sa predsjednikom Vijeća. Prijedlog obavezno sadrži područje rada svakog predloženog kandidata.

Članove Izvršnog odbora Vijeća bira Vijeće javnim glasanjem većinom od ukupnog broja prisutnih članova Vijeća.

Ukoliko predloženi kandidat za izbor za člana Izvršnog odbora nije prihvaćen, postupak izbora se ponavlja tako što predsjednik Izvršnog odbora predlaže novog kandidata.

Vijeće može razriješiti predsjednika i članove izvršnog odbora Vijeća prije isteka vremena na koje su birani na obrazložen prijedlog, na isti način na koji su izabrani.

O prijedlogu za razrješenje otvara se rasprava.

Prijedlog za razrješenje se podnosi u pisanoj formi i mora biti obrazložen.

Ovlaštenja predsjednika Izvršnog odbora Vijeća

Član 30

Predsjednik Izvršnog odbora Vijeća:

1. saziva i predsjedava sjednicama Izvršnog odbora;
2. brine se o poslovima koji su u vezi s radom Vijeća;
3. priprema prijedloge odluka čije donošenje pripada u nadležnost Vijeća;
4. brine o izvršavanju organizacionih poslova u vezi s radom tijela Vijeća;
5. koordinira rad odbora i drugih tijela Vijeća;
6. sa predsjednikom i potpredsjednicima Vijeća predlaže kandidate za šefove odbora i radnih tijela;
7. donosi odluke iz svoje nadležnosti, a koje se odnose na efikasnije funkcionisanje odbora i drugih radnih tijela Vijeća;
8. pomaže rad članova Izvršnog odbora i predsjednika odbora Vijeća;
9. usmjerava rad Kancelarije Vijeća u skladu sa odlukama Vijeća i na osnovu svojih ovlašćenja;
10. utvrđuje poslove Kancelarije u vezi organizacije rada, pripremanja i izvršenja odluka Vijeća;
11. potpisuje odluke Izvršnog odbora i zapisnike sa sjednica Izvršnog odbora.
12. obavlja i ostale poslove u skladu sa Statutom i Zakonom.

Ovlaštenja i poslovi Izvršnog odbora Vijeća

Član 31

Izvršni odbor za svoj rad odgovara Vijeću i predsjedniku Vijeća.

Izvršni odbor je obavezan periodično, a najmanje jednom godišnje, podnijeti Vijeću izvještaj o svom radu.

Predsjednik Izvršnog odbora i članovi su obavezni su o svom radu podnijeti izvještaj ukoliko to zatraži predsjednik Vijeća ili najmanje pet članova Vijeća .

Član 32

Izvršni odbor:

1. podnosi prijedloge Odluka o budžetu i završnom računu Vijeća;
2. podnosi Vijeću prijedloge odluka i zaključaka o pojedinim pitanjima u oblastima upotrebe bosanskog jezika i pisma, privatno i u javnoj upotrebi, te u službenoj upotrebi, odgoja i obrazovanja, kulture i informisanja na bosanskom jeziku, te očuvanju i zaštiti bošnjačkih kulturnih dobara i tradicije u skladu s Ustavom i Zakonom;
3. pomaže u radu oko ažuriranja biračkih spiskova i otklanjanju eventualnih nedostataka za građane pripadnike bošnjačkog naroda koji živi na teritoriji Crne Gore;
4. u saradnji sa Predsjednikom Vijeća predlaže Vijeću funkcionalnu i organizacionu strukturu Vijeća i tijela Vijeća;
5. sprovodi povjerena ovlašćenja iz djelokruga službene upotrebe jezika, obrazovanja, kulture i informisanja na bosanskom jeziku, uz osiguranje finansijskih sredstava od strane države potrebnih za izvršenje ovih nadležnosti;
6. predlaže Vijeću izbor šefa Kancelarije Vijeća i kontroliše rad Kancelarije;
7. stara se o pripremanju i sprovođenju ostalih odluka Vijeća;
8. izvršava i kontroliše izvršavanje odluka Vijeća;
9. pomaže rad na Koordinaciji bošnjačkih institucija i organizacija u Crnoj Gori, uspostavlja saradnju sa bošnjačkim institucijama, organizacijama i udruženjima, koje se nalaze na teritoriji Crne Gore;
10. obavlja sve poslove koje Vijeće prenese u djelokrug rada Izvršnog odbora.

Član 33

Izvršni odbor donosi Poslovnik o radu Izvršnog odbora koji je u skladu sa Statutom i Poslovnikom o radu Vijeća.

Prestanak mandata Izvršnog odbora Vijeća

Član 34

Mandat Izvršnog odbora prestaje:

1. konstituisanjem novoizabranog Vijeća;
2. ostavkom Izvršnog odbora ili predsjednika Izvršnog odbora;
3. ako predsjednik Izvršnog odbora izgubi svoje biračko pravo;
4. ako Vijeće uskrati povjerenje predsjedniku Izvršnog odbora;

Od prestanka mandata Izvršnog odbora, do konstituisanja novog, Izvršni odbor nastavlja obavljati svoje funkcije i vrši sva svoja ovlaštenja.

Mandat člana Izvršnog odbora prestaje:

1. prestankom mandata Izvršnog odbora;
2. podnošenjem ostavke;
3. ako član Izvršnog odbora izgubi svoje biračko pravo;
4. razrješenjem.

Sekretar Vijeća

Član 35

Sekretara se bira iz reda članova Vijeća tajnim glasanjem, na prijedlog predsjednika Vijeća, većinom od ukupnog broja prisutnih članova Vijeća, na vrijeme trajanja mandata Vijeća.

Član 36

Sekretar Vijeća:

1. obavlja poslove koje mu povjeri Vijeće ili Izvršni odbor;
2. učestvuje u radu Vijeća, Izvršnog odbora i radnih tijela Vijeća s pravom rasprave;
3. upozorava Vijeće, Predsjednika Vijeća, Izvršni odbor ili radna tijela na postojanje nezakonitosti;
4. daje pravno mišljenje u vezi prijedloga koji se nalaze na dnevnom redu Vijeća Izvršnog odbora ili radnih tijela Vijeća;
5. stara se o sastavljanju zapisnika sa sjednica Vijeća i potpisuje ih;
6. stara se o stručnoj pripremi prijedloga odluka Vijeća, Izvršnog odbora ili radnih tijela Vijeća;
7. pomaže predsjedniku Vijeća prilikom pripreme i sazivanja sjednice Vijeća;
8. pomaže rad Vijeća, zvaničnika, radnih tijela i članova Vijeća;
9. stara se o čuvanju i objavljivanju odluka Vijeća;
10. obavlja i druge poslove po nalogu predsjednika Vijeća.

Sekretar Vijeća je po struci diplomirani pravnik.

Član 37

Sekretar Vijeća za svoj rad odgovara Vijeću i predsjedniku Vijeća.

Član 38

Sekretaru prestaje mandat prije isteka vremena na koje je postavljen na obrazloženi prijedlog predsjednika Vijeća.

O prijedlogu za postavljanje odnosno razrješenje sekretara Vijeća otvara se rasprava.

Odluka se donosi većinom od ukupnog broja prisutnih članova Vijeća. Ukoliko predloženih kandidat ne dobije većinu glasova od broja prisutnih vijećnika, postupak predlaganja i glasanja se ponavlja sve do izbora.

Radna tijela Vijeća

Član 39

Radna tijela Vijeća su: odbori, komisije i konsultativna tijela.

Odbori

Član 40

Za svoj djelokrug rada, u skladu sa Zakonom Vijeće može formirati odbore na čijem čelu je Predsjednik odbora. Vijeće formira i druga konsultativna radna tijela. Član Vijeća može biti član najviše dva stalna radna tijela.

Predsjednik i potpredsjednici Vijeća, predsjednik Izvršnog odbora Vijeća, kao i sekretar Vijeća ne mogu biti članovi radnih tijela.

Član 41

Sastav i ovlaštenja pojedinih odbora utvrđuje se posebnom odlukom Vijeća, a način rada se utvrđuje poslovnica odbora koji su u skladu sa Statutom i Poslovníkom Vijeća.

Član 42

Predsjednika odbora imenuje Vijeće na prijedlog predsjednika Vijeća i Predsjednika Izvršnog odbora Vijeća, većinom od prisutnih članova Vijeća.

Član 43

Stalni odbori Vijeća su:

1. Odbor za upotrebu jezika i pisma;
2. Odbor za obrazovanje i nauku;
3. Odbor za kulturu i zaštitu arhitektonskog, folklornog, muzičkog i drugog nasljeđa;
4. Odbor za medije i informisanje na bosanskom jeziku;
5. Odbor za Statut;

6. Odbor za odnose sa državom i vjerskim zajednicama;
7. Odbor za prekograničnu saradnju i veze sa dijasporom i njihovim organizacijama i
8. Odbor za finansije i razvoj.

Član 44

Odbor iz svog djelokruga :

1. priprema odluke Vijeća i Izvršnog odbora Vijeća;
2. pomaže rad resornog člana Izvršnog odbora Vijeća;
3. odlučuje o pitanjima koja mu povjeri Vijeće ili Izvršni odbor;
4. organizuje izvršenje odluka Vijeća i Izvršnog odbora Vijeća;
5. inicira raspravu o pojedinim prijedlozima po hitnom postupku;
6. daje mišljenje u vezi prijedloga utvrđenih od strane Vijeća;
7. obavlja i druge poslove koje mu povjeri Vijeće i Izvršni odbor.

Član 45

Sastav i način rada odbora utvrđuje se Poslovníkom odbora koji je u skladu sa Statutom i Poslovníkom Vijeća.

Član 46

Vijeće može formirati privremene odbore.

Nadležnost, sastav i trajanje mandata privremenih odbora utvrđuje se posebnom odlukom Vijeća.

Komisije Vijeća

Član 47

Komisija za izbor i imenovanje organizuje i prati izbore i stara se da izbori proteknu u skladu sa zakonskom, statutarnom i poslovničkom procedurom.

Nadležnost, sastav i trajanje mandata komisije utvrđuje se Poslovníkom komisije koji je u skladu sa Statutom i Poslovníkom Vijeća.

Član 48

Vijeće može formirati privremene komisije.

Nadležnost, sastav i trajanje mandata privremenih komisija utvrđuje se posebnom odlukom Vijeća.

Konsultativna tijela Vijeća

Član 49

Vijeće može formirati konsultativna radna tijela za pripremanje odluka, davanje mišljenja o prijedlozima, kao i za organizovanje i kontrolu odluka.

Konsultativna tijela Vijeća su :

1. Savjet za odnose s Vjerskim zajednicama - je konsultativno tijelo koje se bavi vjerskim pitanjima od interesa za bošnjačku nacionalnu zajednicu. U Savjetu za odnose s Vjerskom zajednicom Islamska zajednica Crne Gore ima dva predstavnika.
2. Savjet visokih zvaničnika – Senat - Zvaničnici u republičkim, i opštinskim parlamentima, ili u drugim državnim tijelima, koji se izjašnjavaju kao pripadnici bošnjačke nacionalne zajednice, mogu biti članovi Senata – Vijeća visokih zvaničnika.

Član 50

Vijeće može posebnom odlukom formirati i druga konsultativna tijela.

Nadležnosti, sastav i način rada konsultativnih tijela ona utvrđuju svojim poslovnicima koji su u skladu sa Statutom i Poslovníkom Vijeća.

Nadzorni odbor

Član 51

Nadzorni odbor broji 5 članova koje bira Vijeće.

Članovi nadzornog odbora između sebe biraju predsjednika i njegovog zamjenika.

Mandat nadzornog odbora traje do konstituisanja novog Vijeća.

Nadzorni odbor pregleda materijalno-finansijsko poslovanje Vijeća , o čemu informiše Izvršni odbor, a na sjednici Vijeća podnosi godišnji izvještaj o načinu poslovanja Vijeća.

V Kancelarija Vijeća

Član 52

Vijeće formira Kancelariju za obavljanje poslova u vezi sa radom tijela Vijeća, pripremanja, izvršavanja i kontrole izvršavanja odluka.

Radom Kancelarije rukovodi šef Kancelarije koji je u stalnom radnom odnosu u Vijeću, ali posao može obavljati i izvan radnog odnosa. U skladu sa potrebama i raspoloživim sredstvima za rad u kancelariji se može primiti određeni broj stručnih lica u radni odnos.

VI Finansiranje rada Vijeća

Član 53

Finansiranje rada Vijeća se vrši obezbjeđivanjem finansijskih sredstava u državnom budžetu i budžetima jedinica lokalne samouprave, donacijama i na drugi način.

Za pripremanje budžeta i završnog računa Vijeća odgovara član Izvršnog odbora Vijeća zadužen za finansije i privredu, a za podnošenje prijedloga odgovoran je Izvršni odbor.

Član 54

Vijeće je dužno da resornom ministarstvu do 31.januara tekuće za prethodnu godinu, podnese izvještaj o radu sa izvještajem o finansijskom poslovanju i izvještajem nezavisnog revizora.

Vijeće je dužno da nadležnom radnom tijelu Skupštine Crne Gore do 31. marta tekuće godine dostavi dokumentaciju iz stava 1 ovog člana.

VII Pravni akti Vijeća

Član 55

Pravni akti Vijeća i tijela Vijeća su: Statut, poslovnici, pravilnici, odluke, rješenja, zaključci i preporuke.

Pojedina pravila o donošenju pravnih akata Vijeća i tijela Vijeća regulisat će se posebnom odlukom Vijeća.

VIII Sazivanje vanredne elektorske skupštine

Član 56

Na zahtjev 2/3 elektora saziva se vanredna elektorska skupština.

U pozivu se određuje mjesto i datum održavanja elektorske skupštine.

Rok za održavanje vanredne elektorske skupštine ne može biti kraći od 15 dana niti duži od 45 dana od dana donošenja odluke iz stava 1 ovog člana.

Poziv sa dnevnim redom vanredne elektorske skupštine, u pisanoj formi, svim elektorima pojedinačno upućuju elektori iz stava 1 ovog člana.

Ukoliko se na vanrednoj elektorskoj skupštini izvrši izbor novih članova Savjeta, prestaje mandat ranije izabranim članovima.

IX Završne odredbe

Član 57

Statut Vijeća se donosi većinom od ukupnog broja članova Vijeća.

Prijedlog za promjenu Statuta može podnijeti svaki član Vijeća ili Izvršni odbor.

Za promjenu Statuta primjenjuju se pravila koja se odnose na njegovo donošenje.

Član 58

Ovaj Statut stupa na snagu danom donošenja.

Usvajanjem ovog Statuta prestaje da važi Statut broj 353/17 od 02.12.2017.god.

Broj: _____

U Rožajama, 05.06.2021.godine

BOŠNJAČO VIJEĆE U CRNOJ GORI

PREDSJEDNIK

Ejup Nurković